

ZON DE EŞQ ESTO

Mahir Çiçek



VİR

ZON DE EŞQ ESTO

Mahir Çiçek

Neşirxaneyê Vir

Vir: 11

Şiir: 5

Zon De Eşq Esto

Mahir Çiçek

ISBN: 978-605-06771-9-5

Neşiro Verin: 2021, İstanbul

Editor: Murat Varol

Qapax & Mizanpaj: Şemal Medya

Resimê Qapaxi: Wassily Kandinsky

Neşir: Deren Matbaacılık Ambalaj San. ve Tic. Ltd. Şti.

Beylikdüzü OSB Mah. Orkide Caddesi No: 9/Z

Beylikdüzü / İstanbul

Tel: 0212 875 48 86

Neşirxaneyê Vir

Yenişehir Mahallesi, Çevlik Sokak,

Kurudere Apt., No: 2/9, Merkez/Bingöl

Mail: zazakivir@gmail.com

Yayıncı Sertifika No: 45295

ZON DE EŞQ ESTO

Mahir Çiçek

VİR

Mahir Çiçek

Serra 1975 de Dersim de Dewa Xariga Binene de ame dinya. Mektebê xu yo verin, werte u lise Dersim de wend. Serra 1997i ra nat weşiya xu ğeribiye de welatê Almanya de rameno.

Bı nameyanê Surbelek (2013), Xezna Canê Mı (2015), Hestir Mezel Nedane (2016) hiri kıtabi xu yê Zazaki; *Bölünmüş Haritalara Ağıt* (2018), *Rüzgar ve Babam* (2019), *Kül Ezgileri* (2020) hiri kıtabi xu yê Tırki esti.

Zon De Eşq Esto, kitabê xu yê hotın o.

Fihrist

Zon de eşq esto	7
Biresê sodır	10
Pê bije	12
Ma hen jê jumin	14
Ez serva to mureno	15
Asmenê payiz o	17
Cigera mı	20
Nêşino	23
Jar meverdê	26
Dej bêzıqmat o	29
Tengê de memanê	32
Wele zil dana eşq	34
Rijiyo xanê ma	36
Werteyê mı u xeyalanê mı mekuyê	39
Maya mı dakıla mı	41
Kes mezano	43
Kokê ma haq dero	45
Tı yê mı ya	48
Bêvengiye	50
Zerya mı	51
Derz meke	54
Bota şo mı ra	56
Tı nêzanena	59
Ez ke şiyoye	61
Haq u pak mendime	63

Zon de eşq esto

Se bıkeri ez,
Zon de eşq esto
Zon de kul,
Zon de tukê derdan,
Zon de zerrê domonan esto...

Se bıkeri ez,
Zerrê mı de roza xo nêresto dej.
Se bıkeri ez,
Dıl de mırad mendo nemezet,
Dıl de hesrete biya ezet
Dıl de dej
Dıl de eşqo rez esto.

Se bikeri ez,
Serva to fetelino na dina ra,
Serva to fetelino nê rayan ra,
Serva to berbeno ez,
Serva to mureno ez....

Zon de helbestê tujikini rowe
Zon de roşta aşma şewe.
Dur ra vineta pencera dewe.

Se bikeri ez,
Bext de ğeribiye esta
Tali de koriye
Dest de neğariye...

Se bikeri ez,
Welat de hesiriye esta
Can de nêweşiye
Na dem de bêkesiye
Hewn de devreşiye
Mı ser de menda dina siye.

Biresê sodır

Riyê to roşt o
Per u tenık,
Sıpe
Jê vore şenık
Qê qılêr pıra nêniştı,
Zelal...

Tij,
Aşme,
Adır,
Çıla,
Nur u nuraniya Haqi,
Hezar parê reng u roştı fami ya.

Nê aqıl ra dur şona dinya,
Nê ki roşti ra dur
Teyna can qefelino rêça xo de,
Teyna can maneno xêca xo de
Fetelino roşt a xo dîma
Awe de nazê adiri vêşeno
Lew u zon suraniya şarabi lêşeni
Werneno ra yel u qomi
Tek tek kışeno.

Rînda mı,
Riyê xo roşt ra zelal ke,
Jê buresê awa sodiri serdın bo
Eşq ra hes bîke wa eşq derdın bo
Çikê eşq;
Hetê roşti de,
Hetê adiri de,
Hetê pakiye de roweno.

Pê bije

Mı ke koti vinena wuza pê bije
Jê kerpetene
Pê bije bojiyanê mı de
Bije vırara xo ke
Puleşiyayişê to weşiya mı na.

Pê bije,
Destanê mı de,
Areqê zerrê lapanê mı de
Çı puk u xezevi estê,
Çı mij u dumani estê
Axme bêrê, şêrê.

Mı ke koti vinena wuza pê bije
Jê zemiqi
Pê bije leşa mı de,
Aste u postê mı de
Areqê leşa mı de
Pê bije vırara xo ke
Puleşiyayişê to weşiya mı na.

Ma hen jê jumin

O riyê to yo kederın
Vist hırıs serri peyser beno aqlê mı
Î çımê to yê heştirini
Canê mı peyser benê domonina mı...

Çıqa mendo ra to ez werteyê no adırı de
Vêşayişê ma ju,
Vileşiyayişê ma ju,
Kederê lilikanê ma ju yo...

Ma hen jê jumin vêşayê,
Ma hen jê jumin ğejil
Ma hen jê jumin
Eşq de jê jilê usarime...

Se beno riyê xo ra keder darde meke,
Çımanê xo ra heştiran war meke.

Ez serva to mireno

Na duriya zerrê mî ra,
Çıqa posind mende hesreta mî
Tomê weşiye nêmend canê mî de
Puşenda to ra mî gureta na weşiye...

Ez to zerrê xo de poşt kerî
Nêzane kata berî
Mezelxane hona zaf duri yo
Gıraniya to poştê mî ra jêder a
Hesreta to mî rê heder a.

Derdê hen gırani estê kê,
Ninê serê zoni
Binê zerrê insan de kunê ra
Hen hurinda xo de derg derg vîndenê.

Xeyal u xirabê mî tî ya
Kemer u dar nêvîno adirê zerrê mî
Vêşeno,
Beno vila
Tî kerra zerrê mî na
Ez wela to...

Omrê mî,
Per u payanê xo rişneno hard
Rengê royê mî şono we
Can oncino teynayiya xo
Deyağê şermê bojiyanê xo ra,
Ez to darde keno,
Ez xo darde keno,
Ez serva to mûreno.

Asmenê payiz o

Tomoranê destanê xo ra xebere bije
Kewiyê asmeni amo, biyo nejdi
Kewto zerrê cani,
Kewto zerrê goni.

Kes nêzaneno payiz
Pelge çeqer
Asmeno kewe

Merdiş ra avê
Dem u dewro xirabe.

Helmode serdın
Gılê koyan ra yeno
Hewadisê vore ano

Endi zimistan
Waxtê merdene vano:
"Payiz asmen o
Kewe dişmen o"

Helmode serdın
Vay puf kerdo
Payiz ser ardo
Germê goni şaneno we
"Germê cigeran
Germê leşe"

Tomorê serê desti,
Tomorê binê poşti
"Jê mosti
Jê xırabin doşti
Jê tija roşti"

Qurmeçiko,
Kes nêzaneno no çiko.

Kewe asmen ra bêxeber o
Kewe tomorenê laşe ra,
Çeqeriya can ra bêxeber o.

Raya kewiye asmen ser şona
Tı çı fam nêkena hona
Kewe tomorenê xo de niyade:
"Xebera çınay ama?"
Merdiş ra awa ju helm
Rawu ra şıye
Nêweşiye
Wena, qedênena weşiye.

Cigera mı

Cigera mı;

Vatena mı awa ke:

"Yê ma merdena de xırabın a "

Zereqê zerrê ma de

Meraxê mezgi şıkıto.

Cigera mı;

Xeyalê ma;

Destê dirvetan de biyê qılêrin

Leşe ra kılın mendê omîdê ma.

Vîlê ma bîne dara derdan de vîsiya,

Bextê ma ebi heştiron nusiya.

Cigera mî;
Xeyal ke,
Eşq zerrê xo de weyi ke,
Jê domanê kundaği pil kê,
Omid çımanê xo de jil ke
Çıkê eşq bêomîd nêbeno
Çıkê xeyal bêweşiye pil nêbeno.

Cigera mî;
Adır gîno dina ma rê,
Tij nêdiya çareyê ma...

Cigera mî;
"Omid deva,
Eşq reva"

Cigera mî;
Tî;
Tî bê,
Weşîya xo
Bê xeyal,
Bê tij meverde
Roz rew vêreno dina ver de.

Nêşîmo

Mı ita caverderê
Tek u teyna dêsan verde
Tobeyê haqî bo,
Çuyê Xızır mı verde,
Ju game nêson xo verde...
Ez ita ameyo serê na dina,
Ez ita mîreno,
Şahadê mı bo Haqo serên.

Na dem u dewro xerepiyaye yê mı niyo
Suji sukanê sıxletan de ramerediyayi yo
Felek zuzaqanê tariyan de wederdıyayi yo
Royê mı ğeribiye de merde yo...

Dayê,
Tı,
Sanciyê, sujiyê hesreta mı ver mekuye
Ez ita mîreno
Welatê xo ra qederî cayê ki nêşino.
Ez ke merdo
Meoncê çımanê mı ser çite
Mı dezê xo zerrê xo ra dîtê,
Germın ê,
Hit ê,
Jê adırî rut ê,
Sure,
Sıpe şıt ê.

Nêşino!
Qerazê insaniye de vêşan nêmereno
Têşan nêteqeno
Ez bê welatê xo na dina de,
Na can; se keno?

Kam se vano, wa vazero
Xızır royê mı welati ra mevezo
Ez caye nêşino,
Zindananê ğeribiye de,
Na can nêerzeno
Eşqê mı ğeribiye rê zıd o
Kam şono wa şero,
Dur royê mı rê Yezıd o.

Kam şono wa şero
Ostomol de zerno bıvino
Çımê mı tey çin o
Ez nêşino
Welatê mı melemê cigeranê mı no.

Jar meverdê

Koti ya?

Zerrê mî hêgayê Gulistan o,

Usar o, gul çiçegê fistan o

Canê mî êyê kışteno

Tî,

Mî,

Lem u kem de jar meverde...

Mevinde, bê,

Vengê şîn u şîwarêno mî bihesne

Çolê Kerbela der o,

Lerze bîke zerrê bela der o

Lapêk awe mî resne

Mî werteyê adirê eşqi de mevêşne...

Tı,
Mı,
Dem u cem de kor meverde,
Tı,
Mı,
Dem u cem de bê sewda meverde.

Tek u teyna mendo serê aso de
Zerrê mı xo pišto te ra,
Xemeliyo zerrê kuraso de,
Weşıya mı biya xırabe leşa xaso de
Ez tek u teyna mendo bine kašo de...

Derdê mı bê to biyo hezar
Eşq mı de mendo bêzar
Kewto mı dime felek u destê xezar
Fetelino bazar bazar...

Koti ya?
Endi vêjiye biye
Tı,
Mı,
Zerrê rem u gem de,
Dem u cem de,
Lem u kem de
Zar meverde...

Dej bêzıqmat o

Tı hes bike,
Wa; a mezano.
Tı dıma şo,
Wa; a ferq mekero.

Tı dormede bê, şo,
Tı qeda u guna bice
Wa; a bar u bela girane bo,
Bınışo cigeranê to ser.

Tı dorme de bê, şo,
Jê vayê koyan
Çıkê vayi ki hes keno her çi ra
Coka fetelino dıme ra
Helmê xo keno pıra,
Lew keno.

Xızmeta zerrê mî
Vırara xo fino to ra
Jedino eve eşq...

Tî hes bîke
Wa; a naz bîkero...
Naz teliyê gul ê,
Naz hevnê şewa bule
Rindekiya Pulê...

Tî serva cî bîmure,
Bivêşe,
Xajil be,
Rezil be,
Xo bî xo,
Xo rê teşil be...

Rozê can reseno hardê xo,
Adır reseno wela xo,
Ro reseno koyê xo,
Eşq niya jedino
Dina niya bena rindek,
Murodi niya yenê pêser...

Tı hes bıke
Çıkê,
Nejdiyê heskerdiş de,
Dej hukımato bêhukım o...
Nejdiyê eşq de,
Dej bêzıqmat o...
Nejdiyê rindekiye de
Dej bêqiymet o...

Tengê de memanê

Tengê de memanê
Zalîmî bê îman ê
Qesê xo giran ê.

Bîhesnê vengê xo
Weşîya xo meverdê,
Destî şarî de
Xezewî werway u viranê
Derd u kulê ma
Zerrê ma de zof giran ê.

Siya dara demdiyayî ye,
Qê qal mekê,
Qiymetê xo qê çîn o
Qulê Haq bindê nêvîndeno

Teyro bêper fir nêdano
Beno werdê heliyan
Tari, tali niyo
Hesiriye de memanê
Awo ke wayirê herdê xo nêvecino
Na dina ra bê bext şono.

Bêbextiye mekê
Hurdikê roşti,
Hurdikê omîd,
Hurdikê eşq,
Hurdikê tali,
Hurdikê azadiye,
Hurdikê hesiriye ra rind o
Xo rind kê.

Wele zil dana eşq

De hey yar;
Mı ra dur mevînde,
Nata bê,
Zerrê mı kuye,
Riyê mı de bîhuye,
Çeribiye ma rê biya siye.

De hey yar;
Şenê mı welatê to yo
Bîngê to zerrê mı de xori şîyo
Çika adiri be
Xo bîrze xanê zerrê mı
Harke kîla zerrê mı
Piya bîvêşime,
Piya bîqedime,
Piya wele bime...

Çıkê;
Wele zil dana dina
Çıkê;
Wele can dana reyna.

Wayirê eşqi hevalê Haqi
Wayirê eşqi wayirê adiri,
Wayirê eşqi wayirê sodiri
Wayirê eşqi bê kardi,
Kewto zerrê risê hardi,
Eve sucê xo merdi.

Rıjiyo xanê ma

Ne; ez zoneno,
Ne; tı zonena
D1 gami raya dîna ma,
Zerrê berbiş de canê ma,
Rıjiyo xanê ma.

Ç1 wanenê çimê to mı rê,
Ç1 vanê hewn u xeyalê mı rê
Eşq mı rê çınayi rê
Dirveti to mı rê çınayi rê.

Goyni biya ma ra
Kul kewt çermeyê ma
De hey yarê;
Niya nêbeno ma rê
Vazê ju çare.

Ça adır bivêşno,
Çajil kero cigeranê ma?
Ça hesrete çar kero zerrê ma?
Ça birjiyo xanê zerrê ma?

Ma xeta kerde xo virare
Leteyê nekot ma virare
Hermeyi niyameyi pêser
Derdi erjiyayi jubin ser
Werteyê dezan de mendime
Gîlê dara zerrê ma ra pepug perra ra.

De hey yarê;
Ez zaneno
Tî ki zanena
Dinaya ma wa bêsitare,
Derdan ver vêşa biya hare.

Werteyê mî u xeyalanê mî mekuyê

Werteyê mî u xeyalanê mî mekuyê;

Yi firdanê,

Benê vind şonê,

Mî ra dur yenê têlewe,

Asmen ra fetelinê,

Lewê mî de şonê we.

Werteyê mî u hewnanê mî mekuyê;

Yi xafilde vejînê yenê,

Yi xafilde benê vind şonê.

Ez fetelino dîma

Ne mekanê inan esto,

Ne ki din u imanê xo.

Werteyê mı u zerya mı mekuyê;
A vaz dana,
Ez dîma kaş beno
A kuna werteyê adiri vêşena
Ez terseno
A reng bî reng kincan kena pay,
Gul u gulistan ra fetelina
Ez jê bîlbîli duri ra şêr keno,
Duri ra waneno
A ebê kay şona,
Ez pay şono...

Maya mı dakıla mı

Maya mı;
Siya şoni kal yena gınena ma ser,
Virêniya ma de rayi pê nêresenê
Virêniya ma de,
Koyi berz ê
Eskefti xori yê
Dina mirozın a
Verdê ra lew u buri yê.

Kud mendê,
Şikiye qorri.
Maya mı;
Tı dur menda
Ez dur şiyoy
Roza ma,
Roza wıyayişi niya.

Xeriviye bivêşo,
Neçariye bivêşo
Bextê ma;
Heşo dîrvetin o ma rê.
Ma ya mî;
Sefkanê qesu,
Kewto zerrê leşa dîrvetin,
Ebe adirê hesrete vêşo.
Haq kena meherediye mî ra,
Meraq meke,
Gîlê leya viyale xo bîn de niyadanê,
Perranê xo, xo bîn de rîşnenê
Kulanê xo kesi nêmisnenê...

Tî ki zerrê xo,
Dîrvetanê xo kesi memisne
Ez qemişê to nêbeno
Tî ke biberbê
Ez xo kîşeno.

Kes mezano

Kes mezano,
Cerabiyayena ma;
Dara mojene mezano!
Bena huşk,
Pelganê xo ruçiknena,
Reyna, boliyan nêdana
Reyna, siya xo ma ser nêerzena.

Kes mezano,
Cerabiyayena ma;
Raya koy mezano!
Bena medağê vayi
Kuna bînê wele
Bena vind şona
Reyna ma ver nêşona.

Çerxbiyayena ma;
Heniyê binê viyalu mezano!
Beno zuwa.
Dılapê awe kesi nêdano
Teşte qır beno teyr u tur
Guna canî kuna vilê ma.

Cerabiyayena ma;
Kes mezano!
Der u ciran heredino
Reyna riyê ma de niyanêdano,
Kes selamê Haqî ma nêdano,
Canê ma reyna murod nêvineno.

Kokê ma haq dero

De;

Hey zalım

Bızane ke,

Kokê ma nino.

Vengê ma hata Haq şono

Vengê ma nêvisino.

Ma;

Onca mirenime

Onca binê hardi ra royenime

Beme astare

Asmen ra onca vorenime

Onca ki dewa xo ra nêvêrenime.

Ti;
Felek verdana ma ser
Wazena ke kokê ma biyaro
Nêzanena ke,
Kokê ma serê hewt qat asmeni de,
Destê Haqi dero
Kokê ma ke bêro
Kokê alemi yeno
Kesi de can nêmaneno.

Tı;
Şon sodır minete kena ke,
Haq kokê ma biyaro!
Nê lawo,
Haq doye bomo ke;
Xo b1 xo kokê xo biyaro,
Xo b1 xo,
Xo bıkışo,
Xo b1 xo,
Xo bıqedeno?

Zalım,
Mineta to mineta kutiki ya
Bızane kê;
"Asmen ra astik nêvareno."

Tı yê mı ya

Tı çê zerrê mı de
Veyvıka de newi ya,
Gulperi ya,
Tı royê canê mı de lewi ya,
Tı gulpızıka sur u kewi ya,
Aşme ra nurê sewi ya,
Mı to de dına diya,
Sandıqa ceyizê xo bije biya
Tı yê mı ya.

Tı zerrê aqılê mı de
Adırode sur a,
Tija sur a,
Soya sur a
Qusur a...

Tı çımanê mı de nur a,
Gonya mı de çamur a,
Zerrê mı de tamor a
Nêsono tılsimê to mı ser ra
Tı sewdaya mı ya,
Tı royê mı ya...

Bê to ez nêmezeto,
Bê to ez zof dırvetın o,
Bê to ez perişan o,
Qe halê mı hal niyo,
Royê mı zof çetın o
Sandıqa ceyizê xo bije biya
Tı yê mı ya,
Tı yê mı ya,
Tı yê mı ya...

Bêvengiye

No va; ne caye de şono
Ne ki mı dıme yeno
No va; vayê koyê Munzuran o
Germê zerrê mı lino
Ro nêverdano çımanê mı de
Bêveng yeno,
Bêveng şono
Bêvengiye ra zof hes keno.

Pakayê şoni
Eşqi zerrê mı kerdo isız
Ezo şono,
Bêvengiya insani
Biya suraniya cemê şoni.
Dina xayine mı de nina
Ezo şono,
Jê suraniya tija şoni.

Zerya mı

Zerya mı,
Dêstra zerrê mı ra nê
Zerrê mı to rê eşqode kıhan o,
Zerrê mı to rê ju rijıyayê xan o
Roşta to adır kafa destanê mı pano
Omıdê mı zonê to siya şano
Vengê resto goşanê mı
Ez zu halê yaman ison o.

Zerya mı,
Zer u zerdaliya mı...
Zerya mı,
Xêr u delaliya mı...
Tı jê awka Munzuri,
Pak u zelaliya mı...

Zerya mı,
Vengê xo derg ke bê,
Tı jê jilê usariya zerrê mı de
Tı jê dendê gul u gulistaniya zerrê mı de
Bax u baxçeyê dina mı
Jê bılbilê gule biwane mı rê.

Zerya mı,
Zer u zerdaliya mı...
Zerya mı,
Xêr u delaliya mı...
Tı jê awka Munzuri,
Pak u zelaliya mı...

Roşta çımanê xo bije bê
Tı tij a, tı aşm a, tı germê adırı ya...
Bê tariyê taliyê ma roşt ke,
Bê omediya ma poşt ke.

Zerya mı,
Zer u zerdaliya mı...
Zerya mı,
Xêr u delaliya mı...
Tı jê awka Munzuri,
Pak u zelaliya mı...

Zerya mı,
Vengê xo derg ke bê,
Zerrê xo zerg ke bê,
Zerrê mı ferq ke bê,
Cigerê mı weri yê
Kulê dîrvetê mı xori yê
Qesê mı qediyê...
Bê;
Omidê mı zonê to de bêrowi yê.

Derz meke

Na çuxura Dersim de,
Bêçare mendime
Kırmancıya xo de bêware mendime
Qederê ma hardê Dewrêşi de nişto ro
Halê ma zerrê ceneme de xo pişto ro
Mineta ma biya welat menda
Eşqê ma biyo haleta gunanê ma

De bê Xızır;
Zerrê ma derz meke,
Qê halê ma pers meke
Derdê ma wu qız gırs meke
Raşt u çepê ma hêrs meke
Eşqê ma xo rê ters meke
Emegê ma dêrs meke.

Nıka sera na dina de,
Qeydê talanê derdan o
No waxto xezebın de,
Her qul nêweşiye ra merdeno
De bê Xızır,
Royê ma dêrs meke,
Qe halê ma pers meke...

Na qucike dina de rındiye nê menda
Qederi verva her gama ma de teli naye ro
Zerya bele cendegê xo rızno
Tali u tezelê raya hesiriye,
Binê poste de domarê ma kerdê qır u kewe
Teyr u tur emegê xo kerd top amo
Kemiye vırara ma de biya şitê toli yê
Şito ke mi ma ya xo ra lito
Lew u pırnıka ma ra yeno.

Bota şo mı ra

Pê loda meyitan ra vejîyo amo

Ez hondê xo rijîyo

Hondê xo merdo,

Têser nijîyo

Zerrê welatanê rijîyaye ra vejîyo amo.

Mı jil do tij

Endi siya xo bioncê mı ser ra

Mı ra xêr çîno to rê

Ez serva hometa xo ita ro,

Ez serwa welatê xo ita ro,

Ez eşqê xo rê sıtar o

Bota şo mı ra.

Çond dewri dem diyayi
Çond hazar serri raverdi
Çond dew ita ra vêşayi
Ez ne biyo vind şiyoy
Ne ki merdo u qediyo meydanê herban de
Onca onca rewo amo
Teynayena mı rew tekite şiyey.

“Teynayena xo mı rew caverde”
Mı qê dilê xo ra şerm nêkerd,
Mı qê xo ra şerm nêkerd,
Tı ke şerm kena Kirmanciya mı ra
Nejdiyê mı mebe
Mı ra duri bota şoy.

Mı hêrs u xof zerrê xo de çerme kerdo
Mı ne zonê xo ra şerm kerdo,
Ne ki neçariya xo ra.
Derd ke çıxa rez u guman bo
Zerrê mı vay dayo
Dina ke mı de herb de bo
Ez eşqê xo ra nêvêreno ra,
Nê texelino
Ez xo ra nêvêreno ra
Tı ke mı ra hes nêkena
Raya mı ser mekuye
Mı ra bota şo.

Tî nêzanena

Dîrvetê dina xayin ê
Perri kerdê ra zerrê mî de
Mî dina xo, xo de vêşna
Mî çizayişê xo, xo de hesna.

Hewnode xırabın ra ustu ra
Perda lilikanê mî de herb
Perda çımanê mî de berbiş esto
Mî çî zulm diyo tî nêzanena.

Mezgê mî yo xawlık ser
Kaniya waxtê xani yo,
Rijiyayişê xanan,
Merdişê canan esto
Tî nêzanena.

Rew şîyo rindekiya xo ra
Rew ustu ra hewnê xo yê şîren ra
Dewlemendiya dina mı hesiri ya
Dewlemendiya cigeranê mı nêweşi ya
Tı nêzanena.

Qe pers meke dina mı,
Qe pers meke halê mı,
Tı zerrê mı nêzanena
Qe pers meke derdê mı
Tı halê mı nêzanena.

Ez ke şiyô

Ez ke şiyô welatê xo ra;

Asmen ke şî,

Haq ke şî.

Ez ke şiyô dewa xo ra;

Xızır ke şî,

Duzgîn ke şî.

Ez ke vejiyo şiyô çeyê xo ra;

Aşme ke şiyê,

Tij ke şiyê.

Ez ke şiyto to ra;
Eşq ke şı,
Roşta mı ke şiyto mı ra.

Ez ke şiyto Dersim ra;
Hir u pîrê mı ke şı,
Gul u nurê mı ke şı.

Ez ke şiyto dina xo ra;
Weşiya mı ke şiyto,
Royê mı ke şı, kışiya...

Haq u pak mendime

Zîdê ma de mend waxt
Çem awerdey şî davacer
Ma tik şîme avero davacor.

Ma xo zof qefelna
Derman nêverda canê xo de
Roz nêverda çîmanê xo de.

Têlmasiya dem u dewri,
Pê bi xu yê dina gewre
Oska xo rê ca guret hewre
Dama xo nê ro
Ma eştime zerrê tora xo.

Xapiyayişê ma de pakiye esta
Coka kesi nasnêkeme
Coka xamime zuran re,
Coka xamime ağu rê,
Jê pîtê qundaqi ...

Na xapiyayiş bela sarê ma
Herey menda rayan ra,
Peyde menda kayan ra...

Şar şî xo çarna zuran,
Ma xo çarna Haqi
Şar şî xo çarna xırabiye
Ma xo çarna jar u diyan
Haq bo dayê;
"Ma pir u pak mendime na dina de,
Coka bela u qeda bextê ma de ina de."

ISBN: 978-605-06771-9-5

